



6. Maaji 2026

UPA2026/141

**Immap naqqani aatsitassarsiortoqannginnissaa siunertaralugu Naalackersuisut inatsisilioqqullugit Inatsisartut alajangiiffigisassaattut siunnersuut.**

(Inatsisartunut ilaasortaq, Pipaluk Lynge, Inuit Ataqatigiit)

Inatsisartunut ilaasortamut Pipaluk Lyngemut aalajangiiffigisassatut siunnersuummik soqutiginartumik saqqummiussinersanut Siumumiit qutsavigaarput.

Immap itisoortaani aatsitassarsiorneq tassaavoq immap naqqani itisuuni aatsitassanik piianeq. Tamanna periuseq atorneqartalersoq nutaajuvoq, tasanilu saffiugassanut aammalu aatsitassanut immap naqqaniittut ujaasineq ingerlanneqartarpoq. Oqartoqartarpoq ullumikkut qaammatip qaavaniittunut ilisimasagut nunarsuatsinni immap naqqaniittunut sanilliullugit amerlanerusut. Tamanna pissuteqarpoq immap itissusaa tikikkuminaatsuummat aammalu misissoruminaatsuulluni. Taamaattumik suli naammattumik immap naqqani ingerlatat qanoq sunniuteqarsinnaanersut pillugit ilisimasaqanngilagut. Peqatigisaanillu immap itisoortaani aatsitassarsiorneq inatsisitigut arlalinnik kalluaasussaavoq, soorlu aatsitassanut inatsisit, avatangiisinik illersuineq pillugu inatsit, imarsiornermut inatsisit aammalu nunatta nammineq pisuussutiminik aqutsinera inatsiseqarnikkut tunngasuni. Taamaattumik taamaaliorniarluni aalajangiinerit annertuumik kinguneqarsinnaapput, aammalu nunami namminerminunani allani malittarisassat ilanngullugit eqqarsaatigineqartariaqarput.

Taamaattumik suliaq una inuussutissarsiornermut tunngasuinnaanngilaq. Pinngortitamullu, aningaasarsiornermullu kinguaariinnullu tulluittunut akisussaaffitsinnut tunngavoq.

Kalaallit Nunaat tassaavoq aalisarnermut tunngaveqartoq. Aalisarneq tassaavoq aningaasarsiornermutsinni inuussutissarsiornermullu pingaarnerpaaq aammalu inuiaqatigiinni annertuumik tunngaviliisoq. Immap pisuussutai inuussutissarsiornermullu tunngaviupput. Taamaattumik aalajangiinerit immap pisuussutaanut tamanut aarlerinartorsiornermullu pingaaruteqarpoq.

Immap itisoortaani aatsitassarsiorneq eqqarsaatigalugu mianersortumik oqallisiginninnissaq pisariaqartoq Siumut isumaqarpoq. Suli naammattumik ilisimasaqanngilagut aammalu ilisimatusarnikkut nalorninartooq annertoqarpoq. Taamaattumik mianersornissamik tunngavik aalajangiisuusaaq. Aalisarnermik kalluaasoqarsinnaanera aammalu imaani avatangiisinik ajoqusiinnaasut pinngitsoornani pinngitsoortinneqarsinnaasariaqarpoq, immap itisoortaani aatsitassarsiornermik ingerlatsisoqarsinnaanngussappat. Tassami imaani avatangiisip aalisarnermik piniarnermillu inuussutissarsiornerput tunngavigivaa aammalu tamanna illersorneqartariaqarpoq.

Siunnersuutip siunertaanut Siumut tapersiivoq, imaanimi inuussutissarsiornerput innarlitsaaliartuartaqarparput. Taamaattorli aamma apeqqut pingaaruteqartoq saqqummiuttariaqarparput: immikkut inatsisiliornissaq ilumut pisariaqarpa? Naalackersuisut apererusuppagut: ullumikkut inatsisit pioreersut, soorlu aatsitassanut inatsit, tassuunakkut illersueriingillat?

Suliap ingerlanneqarnera pillugu Siumut aamma oqariartuuteqarusuppoq. Ajornartorsiuugaarput Naalackersuisut aalajangiissigisassatut siunnersuummut akissuteqaataat Inatsisartut nittartagaanni ulloq ataatsimiiffiup sioqqullugu saqqummiunneqarsimanngimmat. Tamanna akuersarneqarsinnaanngilaq. Pingaaruteqarpoq Inatsisartut paasissutissat pisariaqartitat piffissaagallartillugu pissarsiarisinnaassagaat,



taamaalilluni aalajangiinerit tunngavigineqarsinnaasut tunngavigalugit isummersinnaaqullugit.  
Naatsorsuutigaarput tamanna siunissami Naalakkersuisut tungaanniit pitsanngorsaaffigineqassasoq.

Naggataatigut oqaatigissavara Siumut isumaqarmat aalajangiinerit kinaassutsitsinnit aallaaveqartariaqartut.  
Uagut inuiaqatigiivugut aalisarnermik imaanilu piniarnermik tunngaveqartut, tamannalu pisussaaffiliivoq.  
Immap pisuussutai aammalu inuussutissarsiornitsinni pingaarnerpaat illersortariaqarpagut. Taamaattumik  
siunnersuutip siunertaanut Siumut ilaliivoq, taamaattorli ilumut inatsisitigut tamanna apeqqut  
illersugaareernersoq akissutissarserusupparput.

Siumumiit isumaqarpugut immaq naqqani aatsitassarsiorsinnaaneq ullumikkut inatsisit atuutut tunngavigalugit  
periarfissaanera killeqareersoq. Tamannalu ataatsimiisitaliami qulakkeernissaa pisariaqartoq isumaqarpugut.  
Siunnersuuteqartoq paasisinnaagaluarlutigu siullertut mattussuinermut pitinnata paasisutissat pitsaanerpaat  
siammasinnerpaallu qulakkeernissai Siumup kissaatigivai.

Siumumiilli qularutigissanngilarsi soorunami ataqqinartut aalisartut piniartut aammalu pingortitatta  
avatangiisittalu mianereqqissaarnissaat pingaartillugu aaliangiinissat pitsaanerpaamik tunngaveqarnissaat  
salliutissagatsigit.

Taama oqaaseqarluta aalajangiiffigisassatut siunnersuutip aappassaaneernejannginnerani  
Inuussutissarsiornermut Aatsitassanillu Ataatsimiisitaliami suliarineqarnissaa inassutigaarput.

Qujanaq.

Lars Poulsen, Siumut